

關雎（詩經一）

國風一，周南一之一：

關關雎鳩，在河之州。
窈窕淑女，君子好逑。

參差荇菜，左右流之。
窈窕淑女，寤寐求之。

求之不得，寤寐思服。
悠哉悠哉，輾轉反側。

參差荇菜，左右採之。
窈窕淑女，琴瑟友之。

參差荇菜，左右芼之。
窈窕淑女，鐘鼓樂之。

鹿鳴（詩經一六一）

呦呦鹿鳴、食野之萍。
我有嘉賓、鼓瑟吹笙。
吹笙鼓簧、承筐是將。
人之好我、示我周行。

呦呦鹿鳴、食野之蒿。
我有嘉賓、德音孔昭。
視民不怵、君子是則是倣。
我有旨酒、嘉賓式燕以敖。

呦呦鹿鳴、食野之芩。
我有嘉賓、鼓瑟鼓琴。
鼓瑟鼓琴、和樂且湛。
我有旨酒、以嘉樂嘉賓之心。